



pravosudna mreža  
BOSNE I HERCEGOVINE  
правосудна мрежа  
БОСНЕ И ХЕРЦЕГОВИНЕ  
justice network  
OF BOSNIA AND HERZEGOVINA



forum građana tuzle



Helsinški odbor za ljudska prava  
u Republici Srpskoj

# NEWSLETTER BILTEN

*Pokretanje Pravosudne mreže BiH inicirali su Forum građana Tuzle i Helsinški odbor za ljudska prava u RS, kao dio aktivnosti Projekta održivosti civilnog društva (CSSP). Osnovna svrha Mreže je doprinos nezavisnosti, efikasnosti, nepristrasnosti i samostalnosti bh. pravosuđa.*

| Broj 33. |

## NOVOSTI

### 28.09.2017. Mostar-održana treća stručna javna rasprava "Inicijativa-način finansiranja sudske vlasti"

III radna grupa održala je i treću stručnu raspravu u Mostaru za predstavnike nadležnih ministarstava i nosilaca pravosudnih institucija sa ovog područja (kantoni HNK; ZHK; Kanton 10). Prisutni učesnici skupa su iznijeli slične teškoće sa kojima se suočavaju u upravljanju pravosudnim institucijama, posebno ističući evidentne probleme u finansiranju tekućeg rada, funkcionisanja i održavanja pravosudnih institucija, koji su posljedica trenutnog načina finansiranja. Shodno tome u potpunosti je podržana inicijativa radne grupe o rješavanju evidentne finansijske ovisnosti pravosuđa od predstavnika izvršne vlasti, posebno izražene u F BiH.



**USAID**  
FROM THE AMERICAN PEOPLE







## Jačanje transparentnosti tužilaštava u BiH

Na desetom Savjetovanju tužilaštava u BiH održana je panel diskusija na temu "Jačanje transparentnosti tužilaštava u BiH". U okviru pomenutog panela razmatrali su se važni aspekti savremenog komuniciranja sa javnošću i odnosi sa medijima u BiH, a bilo je riječi i o jačanju transparentnosti putem zvaničnih web stranica tužilaštava. Moderator panela je bila Živana Bajić, tužiteljica Republičkog javnog tužilaštva RS - Posebnog odjeljenja za suzbijanje korupcije, organiziranog i najtežih oblika privrednog kriminala. Panelisti su bili: Maja Đaković-Vidović, rukovodilac odnosa sa javnošću Okružnog javnog tužilaštva Banja Luka, Azra Bavčić, glasnogovornica Kantonalnog tužilaštva Kantona Sarajevo i Admir Arnautović, glasnogovornik Kantonalnog tužilaštva Tuzlanskog kantona. Panelu je prisustvovalo oko 40 tužilaca i tužiteljica iz BiH i iz zemalja regije. Panel je organizirao USAID Projekt pravosuđa u BiH i Centar za edukaciju sudija i tužilaca Federacije Bosne i Hercegovine.

Preuzeto sa: [www.pravosudje.ba](http://www.pravosudje.ba)

## TAIEX međudržavna radionica o reformi izvršnog postupka – način unapređenja efikasnosti pravosuđa

Za veću efikasnost pravosuđa, sudovi u BiH trebaju čim prije biti rasterećeni komunalnih predmeta

Danas je u Sarajevu završena dvodnevna međudržavna radionica „Reforma izvršnog postupka – način unapređenja efikasnosti pravosuđa“, koju je organizovalo Visoko sudsko i tužilačko vijeće Bosne i Hercegovine (VSTV BiH) u saradnji sa Generalnom direkcijom Evropske komisije za proširenje putem Instrumenta za tehničku/savjetodavnu pomoć i razmjenu informacija (TAIEX).

Svrha radionice bila je razmjena iskustava i predstavljanje najboljih praksi zemalja regiona i država članica Evropske unije za unapređenje sudskog izvršnog postupka. Poseban fokus je stavljen na smanjenje broja neriješenih komunalnih predmeta, odnosno sporova malih vrijednosti koji proizlaze iz neplaćenih računa za korištenje komunalnih usluga kao što su električna energija, voda, grijanje i sakupljanje smeća.

Kroz izlaganja međunarodnih i domaćih stručnjaka, imajući u vidu preopterećenost pravosudnog sistema Bosne i Hercegovine ovim predmetima, učesnici radionice su nastojali identificirati najbolja održiva rješenja za jačanje izvršenja neplaćenih računa za komunalne usluge odnosno unapređenje sudskog izvršnog postupka.

Uvodnim obraćanjima konferenciju su otvorili potpredsjednica VSTV-a BiH Ružica Jukić i rukovoditelj Odjela vladavine prava u Delegaciji Evropske unije i Uredu specijalnog predstavnika EU u BiH Richard Wood. "Razmatranje modaliteta i predlaganje inicijative za rasterećenje pravosudnih institucija izmještanjem pojedinih postupaka i prenosa ovlaštenja jedna je od aktivnosti VSTV-a BiH koja je u skladu sa preporukama Evropske komisije za provođenje Strategije za reformu sektora pravde u BiH i Strukturiranog dijaloga o pravosuđu.", naglasila je potpredsjednica Jukić. Ona je također rekla: „VSTV BiH je poduzelo brojne aktivnosti usmjerene ka smanjenju broja komunalnih predmeta. Jedna od najvažnijih je uvođenje Sistema za elektronsko podnošenje i obradu predmeta male vrijednosti tzv. komunalne predmete (SOKOP). S krajnjim ciljem smanjenja komunalnih predmeta, obezbjeđenja efikasnije i ekonomičnije obrade predmeta, stvaranja jedinstvene elektronske baze predmeta, te uvođenja jedinstvenog načina procesuiranja komunalnih predmeta u pravosuđu u BiH ovaj sistem je u obveznoj primjeni u svim sudovima u BiH“

U izlaganju potpredsjednice Jukić također je istaknuto da je temeljem „Analize za zakonodavne izmjene za izmještanje komunalnih/izvršnih predmeta iz sudova formiranjem javnih ili privatnih agencija“, VSTV BiH identifikovao najprihvatljiviji model i donio zaključak da se efikasnost izvršnog postupka može unaprijediti i povećati prenosom određenih nadležnosti sudova u izvršnom postupku na institucije izvan pravosudnog sistema kroz uspostavljanje privatnih agencija, odnosno privatnih izvršitelja u fazi naplate potraživanja.

Imajući u vidu činjenicu da priroda problema leži prvenstveno u neadekvatnim društveno-ekonomskim prilikama, a ne u načinu na koji je pravosuđe ustrojeno, potrebno je razmotriti i neka vansudska rješenja, pored reforme zakona o izvršnom postupku ", istakao je Richard Wood, šef Odjela za vladavinu prava, u Delegaciji EU u BiH i Uredu specijalnog predstavnika EU za BiH.

Stručnjaci iz Hrvatske i Slovenije su predstavili EU model reforme izvršnog postupka (iskustva, prednosti i slabosti) i glavne probleme s kojima se suočavaju komunalna preduzeća pri naplati dugova putem suda. Također se govorilo o modelima izvršnog postupka u zemljama regiona, Srbija i Bivša Jugoslovenska Republika Makedonija i Bosna i Hercegovina. Na radionici su prisustvovali stručnjaci Svjetske banke koji su predstavili ekspertski izvještaj o dobrim praksama u smanjenju broja komunalnih predmeta pod nazivom "Ka efikasnom izvršenju nespornih potraživanja".

Učesnici su imali priliku da učestvuju u praktičnom radu radionice, te daju prijedloge i sugestije s ciljem unapređenja sadašnjeg sistema izvršnog postupka s posebnim fokusom na komunalne predmete. Na radionici su doneseni zaključci koji se nalaze u prilogu saopštenja.

Za više informacija molimo kontaktirajte: Kabinet predsjedništva VSTV BiH, Tel: 033 707 570

*TAIEX (Technical Assistance and Information Exchange Instrument) je Instrument za tehničku/ savjetodavnu podršku i razmjenu informacija Generalne direkcije Evropske komisije za proširenje, koji se koristi kako bi se pomoglo zemljama u usklađivanju, usvajanju i primjeni zakona Evropske unije.*

*Više informacija na Internet stranici <http://ec.europa.eu/enlargement/taiox>*

Preuzeto sa: [www.pravosudje.ba](http://www.pravosudje.ba)

## Koordinacijski sastanak VSTV-a, donatora i međunarodnih institucija

U Sarajevu se održao Koordinacijski sastanak Visokog sudskog i tužilačkog vijeća Bosne i Hercegovine (VSTV BiH), donatora i međunarodnih institucija koji podržavaju pravosuđe Bosne i Hercegovine.

Sastanak je okupio predstavnike Delegacije Evropske unije u BiH, ambasada Norveške, Švedske, Holandije, Švajcarske i Velike Britanije, Vijeća Evrope, USAID-a, UNDP-a i Svjetske banke.

U prvom dijelu sastanka predstavnici VSTV-a BiH su upoznali prisutne o rezultatima tekućih projekata i zadacima koje je potrebno obaviti u budućnosti. Poseban akcenat je stavljen na informatizaciju i unapređenje efikasnosti rada pravosuđa, procesuiranje predmeta ratnih zločina, obnovu zgrada pravosudnih institucija i kvalitetu usluga koje sudovi i tužilaštva pružaju građanima.

Tokom drugog dijela sastanka predstavnici donatora i međunarodnih institucija su istakli postojanje jakog partnerstva sa VSTV-om BiH u realizaciji brojnih projekata od kojih su mnogi dali dobre rezultate.

Takođe je istaknuto da će u budućem procesu pristupanja Evropskoj uniji, pitanje pravosuđa biti od ključnog značaja za cjelokupan proces integracije, te da se reforma ovog sektora u tom kontekstu nastavlja.

Preuzeto sa: [www.pravosudje.ba](http://www.pravosudje.ba)

